

وثائق تاریخیه

تاریخ حربك وثائق رسمیه سنی تشكیل ایده جك نشریاتی تثبیت
ایتمك اوزره وثائق تاریخیه دیه بر قسم آریور و بوهفته ظرفنده نشر
اولونان وثائق بر وجه آتی درج ایدیورز :

بیاننامہ ہمایون

حربیہ نظارتندن بالعموم مواقع عسکریہ تبلیغ قلنان بیاننامہ
ہمایون صورتیدر :

دولت علیہ مزك صلح یورولکی جهانك معلوم و مسلمیدر . عثمانیلر هر
ملتك حقوقه رعایت ایدرلر : هر ملتك ده بالمقابله حقوق عثمانیه رعایت
ایتمسنى ایستلر . عثمانیلرک هیچ بر حکومت حقنده سوء نظری ، سوء نیتی
یوقدر : بنابرین کندی حقلرنده سائر حکومتلرک شعار مصافاته مغایر
حرکاتده بولناملرینی طلب ایتمك حقلریدر .

عثمانیلر هیچ بر قومك سعادتتی ، ترقیاتی اخلاص ایتمك آرزوسنده درلر ؛
کندیلرینك سعادتته ، ترقیاتنه ده دیکرلرینك حائل اولسنی تجویز ایتملر .

مملکتمزك محتاج اولدینی اصلاحاتك ، علی الدوام مصادف اولدیغمز غوائل
عظیمیه رغماً ، بحسب الامکان پی در پی اجراسیله اهلیمزك استكمال اسباب
سعادت واستراحتنه چالشمقده اولدیغمز حالده وطن عزیزمز کوزلرینی دیکن
وترقیات تدریجیه مزك دوائی امل غیر مشرورعلرینك حصولی کیتدکجه دهازایده
تصعیب ایده جکنی بیلن کوچك قومشولرمز اصلاحات وترقیاتمز انکشافنه
مانع اولق و غوائلزدن استفاده ایتمك سوداسنه دوشهرك توحید افکار
وولایات متجاورهمز توجیه سودا انظار ایشلردر .

عثمانیلرک جلادت عالم پسندانسنه بالدفعات جلوه کاه اولان بلغارستان
وصربستان و یونانستان وقره طاغ خیال پرستاننك اقوام عثمانیه نك محافظه
وطن ایچون آلتی یوز یوقدر سنه دن بری فدا ایتدکاری جانلرینی دشمنلرینه
نه قدر بهالی ویرمش اولدیغندن تغافل و ممالکمزك اقسام سائر سندن بعید
ایکی ایاتمزک بر دولت معظمه ایله بر سنه یی متجاوز مدتدنبیری باشلی باشنه
قهرمانانه حرب ایتمکده بولندیغندن ده تجاهل ایده رک سرحدلرمز قوای
عسکریه سوقنه قالدشملرینه بناء نکجهان شجاعت عنوان مملکت وحامی حیت
نشان ناموس ملت اولان عسکر اولادمک سلاح آلتنه جعنه مجبوریت حاصل
اولمدر .

بناءً علی ذلک شیمدیلك برنجی وایکنجی مفتشکلارنده بولنان نظامیه
وردیف و مستحفظ قطعاتك تماما و اوچنجی مفتشکل داخلنده کیلرک قسما حال
سفر برییه وضعی اراده ایتدم .

آباء واجدادکزک ، سزک سعادتکز ایچون مبارک قانلریله یوغور -
دقلمری ، سزک استراحتکز ایچون عزیز جانلرینی فدا ایده رک بو کونه قدر
حفظ ایتدکلمری خاک پاک ووطنك مدافعه سی وظیفه مقدسه سی بو کون سزه عائددر .
هر ذره سی آباء واجدادکزک اجزای مبارکه وجودندن مرکب اولان
اومقدس طوپراقلمری ، آباء واجدادکزک مقبر منورلرینی دشمن آیانغی آلتنده
چیکنتمه مک ، اولاد واحفادکزک ملک مشروعی تجاوزاتدن محافظه ایتمک
عهده کزه متحم بر ذمت مقدسه در .

دشمنلرمز سرحدلرمز طولانیورلر . بتون مقدساتمزی پامال ایتمک ،
آباء واجدادکزک میراثی الکزدن آلمغه ، اولاد واحفادکزک سعادتتی محو
ایلمک حاضر لانیورلر . اجداد عظامکز کی سزکده کمال شجاعتله وطنی
محافظه ، ناموس ملتی مدافعه ایچون حدوده همان شتاب ایله مادر وطنه
اوزاتبله جق دست تجاوزی سیف جلادتکزه کسه رک شانلی آباء واجدادکزک
آلمر کی ستایش جهانه لایق خیر الحفلری ، برادرلری اولدیغکزی عالمه
کوستره جککزدن واجداد پاک ارواحکزک داستان حماسه مناقب مظفریاتکزی

علاوه ایده جکزدن امینم . جناب حق سزی دائماً منصور ، عثمانیلر ی فتوحاتکزله
مسرور ایتمسون .
تاریخ انتشاری ۲۸ ایلول ۱۳۲۸
محمد رشاد

قره طاغك اعلامیه حرب فطره سی

قره طاغ حکومت قرالیه سنك حکومت عثمانیه ایله ظهور ایدن برچوق
سوء تفهملری و اختلافاتی برصورت دوستانده حل ایتمك صرف ایله دیکی
مساعینك نتیجه سز قالمسندن دولایی متأسفم .

متبوع مفخم حشمتلو قرال برنجی نیقولاً حضرتلرندن آلدیم مساعدده
اوزرینه ذات فخیانه لرینه عرض ایلریمکه بو کوندن اعتباراً قره طاغ حکومت
قرالیه سی سلطنت عثمانیه ایله اولان بوتون مناسباتی قطع ایله کرک عصرلردن
بری طائفا مش اولان کندی حقوقی ، کرک سلطنت عثمانیه داخلنده بولونان
قارده شلرینك حقوقی استحصال وظیفه سنی قره طاغیلرک سلاحلرینه ترک ایتمشدر .
استانبولدن مفارقت ایدیورم . حکومت قرالیه قره طاعده بولونان
عثمانی مأمورلرینه پسپورطلرینی ویره جکدر .

۲۵ ایلول ، ۸ تشرین اول ، ۱۹۱۲ امضا : پلامناح

دولتمك باب عالییه ویردکلمری نوطه

زیرده واضع الامضا اولان آوستریا و مجارستان ، انکلتزه ، فرانسه ، روسیه
و آلمانیا سفیرلری باب عالی طرفندن اصلاحات اجرایی حقنده علناً اظهار ایدیلن
امل ونیتی دول خسه نك سندن اتخاذ ایتدکلمری و آوروپای عثمانینك لزوم
کوستردیکی اصلاحاتی و بونك اهلینك خیر ونفعی یولنده ساحه فعله ایصالی
تأمیناً اتخاذی ایجاب ایدن تدابیری برلین معاهده نامه سنك ۲۳ نجی ماده سنك
و ۱۸۸۰ قانونك روحنه توفیقاً باب عالی ایله همان مذاکره ایده جکلمرینی باب
عالیه اخباره حکومت متبوعه لری طرفندن مأمور ایدشلردر .
آزاده بیاندركه اصلاحات مذ کوره حکومت عثمانیه نك تمامیت ملکیه سنه
خلل کتیره مه جکدر .

بالاویچنی ، ژرارد لاوتر ، پومپار ، کیرس ، وانکنهام .
درسعات ۱۰ تشرین اول ۱۹۱۲ - ۱۷ ایلول ۱۳۲۸ روی ،

باب عالیينك هوائی

باب عالی بونوطیه جواباً تشرینك برنده صباحلین ساعت طفقوز
بوچوق راده لرنده زیرده کی نوطه یی آوستریا و مجارستان سفارتنه تودیع
ایتشد :

حکومت متبوعه لری طرفندن مأموراً آوستریا و مجارستان ، انکلتزه ،
فرانسه ، روسیه و آلمانیا سفیرلری حضراتی طرفندن ماه جارینك اونجی
کونی باب عالییه وقوع بولان تبلیغات جواباً زیرده واضع الامضا ذات حضرت
حضرت پادشاهینك امور خارجیه ناظری ، سفیرلر حضراتكده بالذات
مشاهده ایتدکلمری وجهله ، حکومت سنیه نك ذاتاً آوروپای عثمانی ولایتلرینك
لزوم کوستردیکی اصلاحاتی قبول و ادخالی لزومی تسلیم ایش اولدیغنی کندیلرینه
تخطر ایتدیرمکه کسب فخر ایلر .

حکومت عثمانیه بواسطه حاتی هر دورلو مداخلات اجنبیه خارجنده اجراییه
عزم ایتدیکمی و اصلاحاتك بوشراط دائره سنده اجرایی ممالک عثمانیه نك
بوجز شک سکنه سنی تشکیل ایدن عناصر غیر متجانسه آراسنده قانون اساسی
عثمانینك روح حریت پرورانه سی داخلنده آهنک و امتزاجی تأمین ایده رک
مملکتك سعادتته وانکشاف اقتصادیسنه خادم اولقدن خالی قالمایه جغنی تخمین
ایله دیکی جهته اصلاحات مذ کوره یی کمال قناعت ایله نظر اعتباره آلمشدر .
شوراسی شایان قید و اشارتدركه ولایات مذ کوره نك احوال داخلیه سنی
اصلاح یولنده شمدی یه قدر وقوع بولان تشبثات مختلفه منتظر اولان عرائك

کافه سنی اعطا ائمه مشسه بوتأخرک الک باشلی سبیلرندن بری شبهه یوق که مقصدلری نه دن عبارت اولدینی آشکار بولنان تحریک و افساد منبعلرندن تولد ایدن سوء قصدلرک و جنایتلرک باعث اولدینی حال تشوش و اغتشاشدر .

بویله اولغله برابر حکومت سنیه احوال مبرمه الحاسیله دول معظمه نك اجراسنه لزوم حس ایتدکلری تبلیغه تده کی نیت دوستانه یی تقدیرده کری قالمشدر . نتیجه سننده عالم مدنیت ایچون هر درلو وسائط اثلا فجویانه ایله اوکی آلمق اقتضا ایدن بر طاقم مصائب عظیمه یی بهمه حال تولید ایده جک برمصادمه تهلکه سنه مانع اولق اوزره دول معظمه طرفندن صرف ایدیلن مساعیه حکومت سنیه ازجان ودل اشتراک ایدر .

بونقطه ده حکومت عثمانیه دول معظمه نك چاره حلی تحری ایتدکلری مسئله مدهشه قارشیدنده کندیلرینک وظیفه انسانیته روزانه لرینی تسهیل ایده جک صورتده ده اول دورانش اولدینی ظنده در .

فی الحقیقه ، حکومت سنیه برلین معاهده نامه سنک بر جوق موادینک کرک متن معاهده نامه یه ، کرک روحنه مغایر بر صورتده تطبیق و بوضو رتله منافع عثمانیه بر جوق خصوصاً تده اخلا ایدلش اولدینی قاله آلق و مذکور معاهده نامه نك ۲۳ نجی ماده سنک دیگر ماده لر دن زیاده نه درجه یه قدر الحاله هذه بر قیمتی قالدینی تدقیق ایتک ایسته میه رک ۱۸۸۰ لایحه قانونیه سنی هیئت جموعه تاریخیه سیله ایلك دوره اجتماعیه ده قانون اساسی حکومت موجبجه مجلس مبعوثانه و تصدیق حضرت شهریار یی عرض ایتکه کندیلکندن قرار ویرمندر .

بوقانون قبول و اعلان ایدیلر ایدلر مأمورین دولت علیه نك موشکافانه بر صورتده تطبیقنه بذل اهتمام ایده جکلرینه دول معظمه مطمئن اولایلرلر . آز جوق بر اصول دائره سننده یاپیلان و دیگر بر طرز اداره یه خاص اولان اسکی اهل و تعلقان دن حکومت مشروطه حاضره عثمانیه نك صورت قطعی ده اصلاحاته قرار ویرمش اولادینی و ماضینک خطالری بر طرف ایتکه غیر قادر بولندینی حکمنی چیقارمق و بوبابده اظهار ایدیلن بعض شبهه لر یی وسیله عد ایده رک کرک مملکتک ، کرک اهلینک منافعیله غیر قابل تألیف باشقه تدبیرلر آرامق جدأ پک حقسر اولور .

بلغارستانک نوطه یی

بلغارستان حکومتی طرفندن متفقلری نامنه صوفیه عثمانلی مصلحتکذارینه تودیع ایدیلان نوطه نك متنی در :

زیرده واضع الامضا بلغارستان حکومتی رئیس و کلاسی و خارجیه ناظری ، ترکیا مصلحتکذاریدن آئیده کی نوطه ایله مواد ملفوفه سنی حکومت سنیه یه ابلاغ ایلمنی رجا ایله کسب شرف ایلر :

دول معظمه نك آوروپای عثمانیه وجوده کتیر یله جک اصلاحاتی بالذات اللریه آله جکلرینه دائر دول مشارالیه نامنه آوستریا و روسیه حکومتلری طرفندن بالقان حکوماتی نزدنده وقوع بولان تنبیه رغماً بلغارستان ، یونانستان ، صربستان حکومتلری سلطنت عثمانیه داخلنده بولنان خرسیتیانلرک سفالندن قورتارلمسی و آوروپای عثمانیه سکون و آسایشک تمامی تأمین و شمدی یه قدر باب عالی طرفندن اکثریا بلا سبب بر طاقم معاملات ناروا و کیفیه یه هدف اولان بالقان حکوماتی ایله سلطنت مشارالیه آره سننده متین و دائمی بر صلح و مسالمت تأسیسی ایچون یکانه چاره نك اساسی بر طاقم اصلاحاتک جدأ و تماماً تطبیقندن عبارت اوله جغنی حکومت مشارالیه یه بیانک ده مناسب اوله جغنی مطالعه سننده بولنشدر .

بلغارستان ، یونانستان ، صربستان حکومتلری ، حادثات اخیر ده دن دولای بوتشبلرینه قره طاغک ده اشتراک ایده مه مش اوله سنندن طولای متأسف بولندکلری حالده باب عالی یی دول معظمه و حکومت بالقانیه متحدا برلین معاهده سنک یکرمی اوچنجی ماده سننده مسطور اولان واهالینک ملیت عرقیه لر یی ، ولایتلرک مختاریت اداره لر یی ، والیرک بلچیقالی واسوچیره لی

اوللری ، ولایتلرک بر مجلس منتخبه مالک بولمه لر یی ، ژاندارمه و سربستی تدریسات ، میلش تشکیلاتی اساسنه استناد ایدن بر طاقم اصلاحاتی احضار و بولنری استانبوله بولنان دول معظمه سفراسی ایله حکومت بالقانیه ایچلرینک قونترولی آلتنده کیت متساویه ده مسلمان و خرسیتیان اعضا لر دن مرکباً تشکل ایده جک بر قومیسون معرفتیله در حال تطبیقه توسل ایلمکه دعوت ایدرلر .

حکومات مذکوره امید ایدرلرکه ترکیه اشبو نوطه و اوکا ملفوف ایضاحنامه ده ذکر ایدیلن موادی قبول و آلتی آی ظرفنده تماماً موقع تطبیقه وضع ایده جک ودلیل موافقت اولق اوزره سفر برلک امرینی کیری یه آله جقدر . امضا : کشف

مذکور نوطه یه ملفوف ایضاحنامه مواد آیه یی احتوا ایتکده در :

۱ — سلطنت عثمانیه داخلنده بولنان اقوامک مختاریت ملیه لرینک اشبو حقت تولید ایده جکی نتایج ایله برلکده طانمسی .

۲ — عثمانلی پارلمنتوسنده هر ملتک کندی مقدار موجودیتیله متناسب مبعوثلره مالک اولمسی .

۳ — خرسیتیانلره مسکون ولایتلر داخلنده خرسیتیانلرک هر درلو مأموریتلرده استخدامی .

۴ — خرسیتیان جماعتلرینه عائد مکاتبک هر صورتله حکومت مکاتبی ایله مساوی طو تمسی .

۵ — باب عالی طرفندن بعدما ولایتک ماهیت عرقیه لرینی تغیر ایچون هیچ بر صورتله مهاجر اسکاننه تشبث ایدلیه جکنک تعهد ایدلمسی .

۶ — خرسیتیان افرادک خدمت عسکریه لرینی مخلنده ایضا ایتلری و خرسیتیان عسکرلرینک قادرو لرینک خرسیتیانلر دن تشکیلی . قادرو لر تشکیلی ایدیلنجیه قدر خرسیتیانلر دن عسکر آلتامسی .

۷ — آوروپای عثمانی ولایتانده ژاندارمه تشکیلاتک اسوچیره و بلچیقاً ژاندارمه ضابطاتی اداره سی آلتنده تنسیق .

۸ — خرسیتیانلره مسکون اولان ولایت ایچون کذلک اسوچیره لی و بلچیقالی والیر تعیینی و صورت تمینلرینک دول معظمه طرفندن تصدیق و بولنرک معیتلرینه دوائر انتخابیه طرفندن انتخاب ایدلش مجالس عمومیه تعیینی .

۹ — صدارته ملحق و مقدارجه مساوی خرسیتیان و مسلمان اعضا دن مرکب بر مجلس عالی طرفندن اشبو اصلاحاتک تطبیقاتنه نظارت ایدلمسی .

دول معظمه سفراسی ایله بالقان حکومتلری ایچیلری بوجملسک اجرا آتی تعقیبه صلاحیتدار اوله جقدرلر .

انقطاع مناسبات

حکومت سنیه طرفندن تشرین اولک ۲ سنده دول معظمه قاینه لرینه

تبلیغ ایلدیکی تلغراف کده عثمانلی آژانسی طرفندن نشر ایدلمشدر :

بلغارستان و صربستان طرفندن آوروپای عثمانی ولایتانه سفر برلک امرینک کری آلتسنه دائر بزه ویرلش اولان نوطه دن دول معظمه البت خبردار اولمشدر . اشبو نوطه نك بزم طرفزدن بر جوابه دکری اولدینی ایچون صوفیه و بلغاراده بولنان سفرا مزک در حال هر درلو مناسبات سیاسی یی قطع ایله استانبوله عودت ایللری ایچون تبلیغات اجرا قلمشدر . اویله ظن ایدرز که محافظه صلح ایچون صرف ایلدیکم مساعی دول معظمه نزدنده مظهر تقدیر اوله جق و آوروپانک موجودیتندن تجاهل ایله دولتلرک توسطلرینی بر طرفه براقه رق طوغریدن طوغری یه بزه توجه ایتش اولان بالقان حکومتلرینک دول مشارالیه قارشی کوستر دکلری حرمتسزک آ کلاشیه جقدر .

مطبعة احمد احسان و شرکاسی
مدير مسئول : اشرف ادیب